



Եղիշե Չարենց

Եվ մի իրիկուն

Եվ մի իրիկուն գանգերի երգում
Լսեցի վճիտ խոստումները քո:
Կարծես թե հոգիդ իրիկվա միգում
Կանչում էր անտես... Խաղա՛ղ երեկո:

Ու դողանջները կապույտում անծայր
Թիթեռի նման ճախրում էին դեռ
Երբ հեռուներում գնգալով անցար,
Որպես մի դողանջ, մի լուսե թիթեռ...

Անցար լուսավո՛ր, հեռավո՛ր, թեթև՛,
Ճառագայթի պես իրիկնամուտի:
Իսկ սիրտս՝ տխուր, հոգնաբեկ, անթև,
Խմում էր իջնող տագնապը մութի...